



國朝寶鑑

U 6  
4511  
17



門牌  
號4511  
卷28-17

國朝寶鑑卷之五十一

肅宗朝十一

**二十五年**春正月 上下備忘記曰嗚呼  
邦運之不幸胡至於此哉四年大殺萬死一  
生之餘喘又罹無前之虐癘自春徂冬愈往  
愈熾如水之漬若火之烈始自西陲遍及八  
路里無完戶百無一瘳列幕相望歌吟相聞  
而毒之尤者至有闔家俱沒之慘積尸成堆  
鬼哭啾啾兵燹之禍曷足喻急嗚呼比歲灾  
荒非不酷矣而土著之殆盡未有甚於去年

其為驚心又不啻飢火矣嗚呼民靡孑遺國將焉依用是憂遑食息不寧虔誠祈禱靡不用極而神不我顧冥應猶邈究厥所以罪實在予赤子何辜嗚呼鸞輅迎春和氣藹然草木昆蟲咸囿雨露而奈之何饑饉扎瘥迭為災害使我環東土億萬蒼生獨陷於危亡而莫之救為民父母當作何懷念之至此不覺投淚予心若茲內而京兆外而按道之臣詎不思所以體宵旰之憂盡拯濟之方乎須以此意另加勅諭其於給藥救療毋或死亡收

屍埋瘞毋或暴露等事勿視閒漫着實舉行而稍待疫癘之寢息特施軫恤之惠澤亦宜分遣近侍於中外設壇賜祭以示憫惻少慰煩寃後又以若不舉行及歸虛文必為斯速講定之意下教于筵中○領中樞南九萬以年至再疏請休致 上賜批隆重略曰卿之去國閱四箇月矣寤寐思想久而采深卿豈獨無係戀之心乎况丁丑春八對便殿握手面諭之事不啻情如饑渴以卿體國深忠胡不諒予倚毗之誠而汲汲然捨予若是耶予

實慚恧無以為懷至於引年之請尤有所不  
然者昔文潞公以八十之年猶不許其休致  
十日一朝議事都堂矧惟今日是何等時乎  
饑饉連仍疾癘慘毒憂虞之端指不勝屈正  
宜協心扶顛之不暇豈忍袖手忽視耶藉令  
卿雖已致仕起以自輔如潞公平章軍國重  
事之古事其可勉從不當從之請以忽無遺  
壽考詢茲黃髮之道乎卿其體予心腹之辭  
潘然造朝毋孤日夕虛佇之望○王世子痘  
候平順已至落痂 上命罷議藥廳仍下教

曰孔子曰父母惟其疾之憂親之於子雖偶  
然寒暑之感憂念無所不至况今世子所經  
痘瘡者何等患候耶夙夜焦慮寢食不甘矣  
幸賴神明陰隲已臻平穩之境父子之情歡  
喜何極值此非常之慶詎無非常之舉矧今  
春王正月雨露霑及枯莖正宜法乾元之至  
仁體雷雨之作解特施曠蕩之典咸與歲而  
維新禁府刑曹時囚中除綱常賊污殺入強  
盜詛呪雜犯死罪以下該房承旨即為馳往  
一一放釋徒三年以上雖尋常疏決亦多並

唐書卷之五十一  
三  
宥之例使之依此舉行而兩銓歲抄並為蕩  
滌士大夫彼謫未蒙宥而身死者亦皆還給  
職牒諸道時囚一體為之○二月引見大臣  
備局諸臣判府事崔錫鼎言六臣祠之仍存  
嚴興道之褒贈聖德事也追聞元昊仕文  
宗朝官直提學端宗初年退居原州逮昇  
遐入寧越服三年喪光廟特授戶曹參議  
屢召不至宜有旌表激勸之道士人金時習  
自光廟受禪落髮逃世中間還俗娶妻而  
無子孫其文章節行卓卓可尚亦宜贈職賜

祭上命吳旌閭時習贈職賜祭該曹贈執  
義○三月上復親臨淑明公主家厚賚布  
綿米豆仍賜詩一律曰雨後春風轉翠華向  
主齋沈痾欣去體重見好開懷高閣瓊筵設  
名園景物佳可憐和樂地誰奏八音諧○夏  
四月上曰為國急務莫過於勸農每當春  
節非不申飭而飢饉癘疫死亡相繼子遺殘  
氓有難用力於畝畝曾前節目更加添刪申  
飭諸道可也○御書講檢討官宋徵殷請法  
世宗朝修治崇政殿不施丹雘之事務尚儉

德知經筵事李濡又引 宣廟朝時御三升衣戒飭宮中毋服錦繡之事縷縷申戒 上並嘉納之○御晝講知經筵事李濡曰 世祖朝監察鄭保庶妹即韓明澮妾也保適往明澮家聞明澮以鞫治成三問事赴闕奮罵曰成三問朴彭年乃正人君子殺之後世必有惡名仍拂衣而去明澮聞其言即白于朝遂鞫之保抗聲言果有是語 上命輟之及知為鄭夢周之後孫以為忠臣之後而特釋之遂流配有司乃以逆律破緒焉今莊陵既

已復位若此類宜許伸理昭雪矣 上命該曹稟慶後吏判申琬陳達筵中遂復官焉初上以 顯德王后考權專追削官爵為庶人子自慎被極刑逮 中廟追復昭陵必有復官之舉命該曹考慶又考公私文蹟並無載錄慶至考實錄亦無有至是 上特命專父子並復官○五月 上下教曰古人有喜雖少輒以名物蓋以志不忘也况其大者耶今春世子患候康復實莫大之慶則其可無志喜乎遂改其所居藥淵之堂名新揭華額所

宜即命詞臣記其事而第念歲在辛丑誕降之初乃次于此堂辛酉舟梁之年又次于此堂故當其改號之時中壺以合此慶命名之意縷縷陳請予乃勉從易其堂名曰集慶即諸慶萃于一堂之謂也以故予嫌其自己之事亦涉其中尚今泯默矣更為思惟嫌於自己並與其忻悅之事而無傳可乎其令左相集慶堂記製進蓋堂在慶德宮 王世子處于斯堂新有平復之慶故有是命崔錫鼎應命製進命賜康皮○先是慎妃祠節目有稟

定之命至是禮官改稟立祠處定以昭顯廟北墻外祠宇守直守僕軍率令兵刑曹定送神主移奉時上下馬際引路軍烏杖忠贊衛前導內侍一人陪進常以春秋二仲朔上丁行祭寒食忌辰祭墓所而凡祠宇時祀及墓祭並令內侍無祝設行祭物床褥之屬令該曹進排守墓軍亦令兵曹定送○六月下備忘記曰藐予小子纘承丕緒二十有五年無疆惟恤不遑寧處鄒聖保民之訓平生誦之而夷考行事鮮有實惠之及民民困如此則

視聽自我之天安得不赫然威怒乎緣予失政自速譴責饑饉荐仍毒癘尤慘周民之靡有孑遺唐家之十無一瘵曷足喻其急哉中夜以思憂虞百端無樂為君寔我心也迺者蘊隆之灾又酷於扎瘥之餘夏序將盡魁虐彌甚惡風霜雹海溢迭為灾害春年萎損秧苗愆時噫天下之本實在於農國之安危民之死生何嘗不係於稼穡之豐凶哉矧今饑癘餘民勤斯勞斯日望蕤蕤而不幸今日瘳我以旱民將盡劉國其焉依代犧嬰茅親禱

社壇而微誠未格聽我愈逸嗚呼一人有罪萬姓替受興言及此尚寐無吪自今日避正殿承旨代予草教自政府廣求直言以匡不逮言雖不中予則優容噫東西標榜固百年難醫之疾至於分門割戶戈戟相尋未有甚於近日縱曰末俗嘵嘵私意橫流亦未必不由於在上之人不能盡建極之道也咨爾大小臣工世篤忠貞無謂我不足有為而舍我必也痛去朋黨專心國事答上天仁愛之譴致國家和平之福古語云乖氣致異昨今兩



年中外無辜之死於疫癘者不知幾萬煩冤未散足以干天和而致災沴念之嗚咽設壇賜祭曾有成命而當此靡不用極之日不可一向遲待其寢息也減膳等事令該曹舉行政院請以備忘播告中外再啓允之 上仍命禁府刑曹時囚徒流充軍罪人並於明日榻前疏決○命全家死亡者田役身布糶穀累年未捧者並蕩減因判府事柳尚運所達也○初禮曹磨鍊避殿節目並舉勿擊鼓一節 上問前例禮曹據壬戌癸亥年例以對

備局啓以遇災撤樂指駕前鼓吹宮庭宴樂而言昏晝擊鼓所以辨更漏定時辰不可以鐘鼓論之周禮凶灾有擊鼓之文 仁祖朝己卯避殿勿擊鼓似出一時稟定未必深考意義其後因襲成例不過未及照管之致今此勿擊鼓一款宜勿舉行 上可之○秋七月領中樞府事南九萬疏陳既還後不敢復進之義 上賜優批略曰昔皇明戴珊乞致仕 孝宗不許令劉大夏諭以太平未兆不忍捨朕先歸之意珊泣下曰吾不得還家君

臣情志之相孚可見於數百載之下也矧今國步之艱難不翅太平之未兆小子之倚信又不翅戴珊而卿之棄予愀然一至於此是豈平日所望於宿德元老頃年二三大臣久遜荒野卿以事體非宜至請召還卿昔日之請即予今日之心則此又不可不念也予志堅定不起不止卿無困我○領府事南九萬連章陳懇乞引年致仕 上不許乃下手札別遣史官傳諭略曰昔唐之文皇身致太平而不許房玄齡之歸第至有如失兩手之諭

况宿德如卿而遭茲岌業者乎反覆以思實無必退之義也九萬猶不應命○先是礪良府院君宋炫壽及權專有賜祭之命禮曹叅判吳道一奏言墓所及子孫訪問不得成命亦不可廢閣設虛位賜祭雖無大妨而此亦無前例矣禮曹叅議李寅燁曰故老相傳果川地有宋炫壽夫人墓而表石字形漫漶不可識認云矣領議政柳尚運請發遣禮曹郎官詳問看審 上可之及往審果是宋家先山而皆有表石夫人墓亦有表石書曰驪州

閔氏之墓雖已漫漶猶可揣知道一又奏礪  
良既以罪死葬必不備禮雖在一山之內有  
難識別設位賜祭雖未知有前例以古事言  
之或有曠感前代而賜祭者或有戰亡異國  
而賜祭者此豈有墓所之可祭乎况此是宋  
家先山與別處有異臣意以此措辭于祭文  
中就墓下為位賜祭未見其不可請詢大臣  
而處之柳尚運李世白皆言設位致祭雖無  
前例猶勝於廢閣致祭之為欠典 上可之  
後又命修築墳墓權專墓久訪不得後右議

政李世白自莊陵還奏安東府使洪得禹言  
在安東地表石宛然於是始行致祭○閏月  
先是淮陽府使俞信一以儒生李友白犯其  
前導棍打殞命信一因此就囚以友白之死  
歸之於洙癘禁府請行查江原咸鏡兩道乃  
得杖斃狀諸大臣皆以不拘獄體只就其情  
節而斷定恐有後弊為言 上判曰殺人者  
死三尺至嚴而我國償命之律獨不行於士  
夫此外方官吏之無少顧忌或因喜怒或因  
私嫌濫刑殺人若刈草菅者豈不痛心哉今

此俞信一棍打科儒之事渠既自服李友白之死於辜限之內亦已明覈而今乃拘於檢驗之未備有所輕重則使死者幽冥之冤何由得雪仍記昔 孝廟朝有李曾以縛人沈殺之罪竟致杖斃等是殺人而信一獨追刑章則曾必寃於泉下矣且無寃錄第九檢驗骨殖無定制例云憑何典例將骨檢驗定執致命根因仰照驗照勘明白研窮磨問鍾元七端的致命根因取責各各招準實詞牒審無寃依例結案雖以此觀之殺獄出於年久

之後不得檢驗而若被害情跡明白則結案依律之意也及復思之信一實無可傳於生議者依法律處斷政院遂繳奏曰殺獄檢驗法意有在該府之請議大臣大臣之以此獻議俱出於慎刑獄慮後弊之意宜更詢大臣而處之答曰法者 祖宗之法決非爾等之所敢低昂者也自古安有君上守法而臣下覆逆以冀屈法者乎昔年鄭濟先救解之說極其紛然而苟且之論至發於臺閣心竊慨然有所下教矣不料今日舊習猶存作此放

肆之舉信一之勢焰可謂重而李俊白供辭中名官之棍打此儒而死何至償命之說大行於搢紳云者誠不誣矣濟先之屈法未免失着則何可再誤噫若使信一生出金吾之門是無法之國祖宗之法予不敢撓改也繼下備忘記曰俞信一殺獄昭著難掩律以三尺烏得免死藉令償死之命出於特恩職在近密者惟當爭執而况判付辭意實出重償命之律慰死者之冤此非係於一時喜怒則汲汲覆逆欲傳生議者豈非可駭之甚乎

承旨趙泰采李廷謙並罷職信一竟死於獄  
○減賊吏李祥輝死定配于全羅道靈巖郡  
先是禁府令本道查祥輝所賂米果為月俸  
餘米與否以啓及查報至禁府引先朝全  
州府尹李延年私用月俸參酌定配之例讞  
奏之上下大臣議領議政柳尚運等以為  
私用月俸係是不法不可不定式禁斷而未  
及定式之前只以法無勿問之文斷用賊律  
未免異同於李延年事故上有是命○教  
曰永禧殿影幘移安時納于黑長櫃安于紳

舉此則平時儀衛也脫有緩急奚暇備儀衛  
首在兵燹先王時容至有不忍言之變思  
之至今不覺隕淅也予意以為別造一黑長  
筒平時奉安於真殿後別殿急難時三朝  
時容皆安于筒內隨便陪往實為萬全其令  
稟慶後禮曹覆啓奉行焉○引見大臣備局  
諸臣領議政柳尚運曰京衙門投屬散役之  
類盡數搜出合為一萬餘名五千餘名則仍  
屬各衙門五千餘名則汰給所屬官以充闕  
額京衙門既行搜括則外方不宜異同監督

以下各營門及各邑亦宜出其所屬良丁一  
意簽補牙兵軍官則各營先定其額數州府  
郡縣亦令計邑大小量事煩簡相議定額開  
錄上聞而此外道臣可以擅便者則亦使並  
為釐革充補闕額趁今查正定以限歲前完  
畢似宜上可之尚運又曰書院疊設朝家  
雖有禁令撤毀未易或不無賜額之處今宜  
更申其禁而良民募入者甚多良丁職此而  
日縮自今已賜額書院則以二十名募入為  
定額其餘則盡定他役未賜額處則不許募

入已入者勿論多寡並令罷定而此後如有  
創立書院之處必須陳疏得請然後方為營  
建而其不待朝令擅自建祠者當該地方官  
論以重律事著為定式恐得宜 上又可之

○九月 上覽海州安姓女人擊錚受辭命  
拿問牧使李紉周查究濫刑殺人狀時官吏  
或多用濫刑往往濫殺人命 上深嫉此弊  
必欲痛懲之故有是命○冬十月藥房入診  
上曰予自在春宮已有火症其後連遭罔極  
之痛且早當萬幾值荐饑焦慮熏心鬚髮盡

白予性又不緩事務當前不能置之飢飽失  
時勞悴太過近來眩暈幾作如在舟車上移  
時乃定如是而精神筋力餘存幾何臣僚中  
久掌劇務者精力易敗曾見戶判閔鎮長為  
兵判時顏色換脫此亦勞傷所致予於戊午  
以前雖不可謂慎攝而戊午正月重病以後  
仍為獨處十四月積成工夫最是心火為三  
十年病根實有難言之憂矣提調申琬等以  
節慎起居願養精神之意陳達而退○十二  
月召對玉堂官 上以新歲不遠日寒尚酷

命承旨持典獄囚徒案入侍必贊官許輝奏  
囚徒錄只是列錄姓名略書罪目輕囚則固  
當疏釋而至於重囚不可只憑此案而輕議  
令刑曹堂上參考文案酌量情罪與備局諸  
宰商確仰稟自 上或施特恩此古昔人君  
親錄囚之意也 上是之命輕囚抄出即放  
重囚依輝言舉行仍命各道方伯取考該道  
罪囚文案輕則裁處重則論列啓聞○召對  
玉堂官 上曰大學首善之地而士習漸偷  
科舉用人之本而場屋多奸何以則可救此

弊耶檢討官具命峻請大司成別為久任大  
比科外勿為頻設科舉參贊官宋廷奎言文  
臣中能文而公正者預為抄啓臨科則自  
上定所點下差備官亦擇有地望惜身名者  
則庶可救弊 上並許商量講究

**庚辰**二十六年春三月 上下教曰儒生賜第  
其道太廣宜加變通以杜僥倖從今日定制  
黃柑外勿許賜第庭試謁聖取三人而或因  
慶別設庭試則臨時稟旨俾存區別之意○  
秋七月初統營所屬欲智島為王子宫折受



國朝寶鑑卷之五十一  
統營馳啓防塞備局覆啓請施 上特命仍  
屬該官至是工曹判書申汝哲上疏言臣曾  
任此地備諳形勢統營若失此島則船材何  
以取用什物何以維持是無統營也無海防  
也豈為一官家設庄地廢罷其遠規以損其  
威重也哉 上荅曰山腰以上嚴加禁斷則  
似無海防踈虞之慮也領議政徐文重又劄  
請依廟堂覆奏毋許折受 上荅曰欲智島  
既云海防重地則不可一向留難宜令該曹  
勿論某衙門隨其願受另加擇給至於零兒

等島是百餘年賜予之地而自宮買得則盡  
許所伐予未知其不可也關防緊要之地自  
今毋得折受焉○宗臣益寧守梯密陽正稅  
等上疏進宋徽宗畫本 端宗大王筆及  
崇禎皇帝書蹟 宣祖大王御筆政院據前  
日御筆勿捧之傳教而退却之梯等遂稱有  
下教政院陳啓以稟荅曰頃日下教宗臣使  
之覓進者即歷代帝王名筆蓋指如唐之太  
宗皇朝 崇禎筆蹟而然也至於畫圖不魯  
舉論而乃者梯等疏辭有若並與古畫而覓

進者然事之無據莫此為甚並罷職 崇禎  
皇帝書蹟 宣祖大王御筆捧入可也○冬  
十一月弘文館上劄請以治心為治病之本  
仍曰彼職在保護之臣不能預先審慮及時  
調護則不敏之失藉曰有之此不過無妄之  
一眚也因一微眚遽加嚴旨淵衷所惱輾轉  
層激多少不平底意溢發於前後之教至使  
公孤重宰席藁經日暴情無路而羣下危懼  
爰象不佳此豈平日所望於 殿下哉伏乞  
先從本源克致和平以為攝養聖躬之本凡

於威怒之際深戒暴遽教誨之間曲賜開釋  
使上下無阻情志流通焉 上嘉納之○諸  
道饑饉全歿者糶穀蕩滌數合各穀七千七  
百四十八石零諸色軍布一百六十一同三  
十九疋各軍門保米九百八石零錢文五千  
八百四十餘兩○十二月 上命廟堂區別  
諸道中田穀尤甚被災處量減稅豆後備局  
啓請減二斗○黃海道谷山地金二悌者以  
童稚之年刺人於場市之中以復其殺母之  
讎仍又歸身官家以請擅殺之罪道臣馳啓

以聞下刑曹議大臣稟慶諸大臣皆以為宜  
褒不可罪 上命分揀

**辛巳**

二十七年春正月因禮曹啓辭命啓聖廟

依皇明之制以啓聖公祠揭號○二月宗臣

靈原正樞上疏進 宣廟朝辨宗系時和馬

維銘詩御製及諸臣廣和寫本 上荅以予

當量慶其後詢于大臣刊印傳布名曰光國

志慶錄是後 上次維銘詩並製小序親書

下之令入刊序曰璿系歸正慶溢宗祊奎章

昭回聖德愈謙每一伏覩未嘗不莊誦欽嘆

也今者宗臣靈原正樞以 聖製及諸詩合

為一部具疏投進披閱再三激切于中謹以

其韻吟成一首少伸贊揚之忱詩曰雪盡神

人痛良由積至誠箕疇歡復叙邦國喜重營

綸綍迎銜鳳歌謠雜轉鶯豐功何煥赫日月

並昭明○三月備局引見時 上曰日者海

州儒生上疏言山名首陽洞彌兄弟故立祠

享夷齊仍請賜額想像遺風實有曠世之感

其特許之又曰烽燧乃所以報警而北路絕

烽已至十數年此可憂也右議政申琬曰北

國朝典章卷之五十一  
路烽臺多在海山重峯疊嶂雲霧蔽塞烽火  
之不得相準勢固然耳吏曹參判李寅燁曰  
今北虞侯全百祿北人也必慣知地形宜命  
商量便否上聞俾有以改其制從之○晝講  
時 上下教曰烽火有國所重而徐日立崔  
余尚等乃敢稱以抱冤偽舉烽火情狀絕痛  
若不別樣處斷日後之弊不可勝言梟示警  
衆之命蓋以此也第念蠢茲鄉兵不知其當  
死有此妄作而遽依軍律有乖於三令五申  
之道特用寬典並減死絕島定配從今定制

凡奸民之稱以訴冤偽舉烽火驚動人心者  
勿論烟臺與他處一併梟示以嚴軍律○禮  
曹言啓聖祠祭器品式取考皇朝圖書編則  
啓聖公與大聖位一體而所減者牛一四聖  
位器品比大聖位減牛一籩二而啓聖公配  
位則又降殺於四聖故所減者羊一簋籩各  
一籩豆各四也我朝則大聖位與配位一體  
啓聖公與配位似當一體而器品則不可無  
降殺之節圖書編所載啓聖公位則帛一羊  
一豕一爵三配位則各帛一爵三猪肉二矣

從啓聖公位器品則所減者牛一太無減殺之意從配位器品則與圖書編所載十哲從享儀相同而無一羊矣羊豕從啓聖公同用而器品則從配位與十哲從享儀而享官則從圖書編所載以國子三品官定送似宜大臣之意亦如此 上從之○夏四月 上親定海州首陽山夷齊廟之號曰清聖廟以御筆書之下于政院政院請依文會書院賜額例自本院模寫以刻遣近侍揭之 上又以御筆書跋文使之添刻于板末其辭曰頃因

海州儒生崔沈等上章特允夷齊廟宣額之請仍以御筆頒下額號聊寓想像清風千載起敬之意焉○啓聖祠成齊國公叔梁紇主享曲阜侯顏無繇泗水侯孔鯉配享在東萊蕪侯曾點邾國公孟孫氏配享在西初顏無繇曾點孔鯉配于文廟故先期告事由移安于別堂改題位板及是日安于新祠○五月下教于政院曰昔漢明帝以楚獄多濫夜起彷徨親詣洛陽獄多所決遣誠千古之羨事然此出於人主之特命則可也有非在下者

所可直請故日昨權燧之疏斥以妄率者蓋  
以此也今金吾囚者至於八十餘人之多因  
圍狹隘露處者多一年二年了當無期幽鬱  
之氣豈不干天和而召災沴乎還宮輦路當  
過金吾門外欲倣故事親詣慮囚以為疏鬱  
導和之地自本院舉行○上詣社稷兩壇行  
祀訖將還宮歷御義禁府虎頭閣慮囚大臣  
禁府堂上政院三司並入侍判義禁金構持  
文案以進 上曰親臨為科獄故也其先問  
之仍命承旨問吳碩夏洪受禹宋晟李聖輝

金麟至朴泰晦李秀哲李道徵俱持前說不  
肯服 上曰親問之下亦敢隱諱情狀絕痛  
仍囚嚴刑其餘囚者重則仍囚輕則或遠配  
或徒配或削職或罷職或仍職出獄者四十  
五人議罷遂還宮○下備忘記曰噫予眇躬  
忝主神人德涼政厖災害並臻前冬之震電  
今夏之霜雪罔非可驚可怕夙宵靡寧若隕  
淵谷噫嘻今茲亢旱亦孔之酷矣彌月恒暘  
大地焦赤兩麥既萎百穀未播萬姓魚喁大  
命近止東作已失西成可望靡神不宗主璧

既卒而視天夢夢雨意愈邈噫比歲飢荒民未蘇息而旱又此極為民父母當作何懷昨詣社壇代犧親禱而微誠未格出日杲杲言念民事心焉如灼靜思厥故罪在不辟反躬省愆奚止六哉一倍危懼幾忘寢食也自今日避正殿益加寅畏之心承旨代予草教宜自政府廣求直言以匡無德言雖不中予則優容噫今日召灾職由一人而亦豈無飭勵羣工交相儆戒之道乎咨爾大小臣僚體予宵旰之憂痛革玩愒之習精白一心奉法率

職以答天譴弘濟時艱減膳禁酒事令該曹舉行承旨洪受疇李濟請勿代草直以上旨布諭中外從之○秋八月 中宮殿昇遐于昌慶宮○禮曹言五禮儀成服條有禮曹判書跪請成服之文而乙亥喪禮今無可攷庚申前例無此一節抑因喪出別宮而然歟依禮文自 上成服之日禮曹判書跪請成服為宜 王世子成服時亦宜有贊請之節似當以宮僚舉行從之○領議政崔錫鼎左議政李世白請對 上引見錫鼎曰當此國

恤士夫家大小祥儀節宜有定式以禮記言之曾子問君服中私喪變除孔子以除服不當過時答之禮意甚明鄭註亦不誤而疏說以行祭於君服除後誤解之本朝禮文無他可據五禮儀有卒哭前大中小祀停廢之文故遂以為例近世士夫多行祭於卒哭後而所謂大中小祀乃國家祀典非指士夫家祭祀也以義理言之國恤中士夫家時祀可廢而忌墓祭猶可略行練祥虞卒哭是喪中之祭本無吉凶相襲之嫌且士夫之在喪者國

恤成服後居家無服君喪之事而仍服過限之私喪非但不合於禮經亦不合於疏說之義我東先儒所論固多而近世先正臣朴世采之言亦頗明白宜自朝家定制使之依禮經行祭而除服也又曰國恤時元無禁葬之令而每當山陵未定士夫家不行葬禮因以成俗禮曰葬先輕而後重蓋君重而親輕士夫之先葬其親於禮不違且大夫士庶人之葬期各有月數若踰月則便成僭禮今亦宜使營葬並從之○執義金致龍等論 大行



王妃證候元非急疾而兩載議藥無一收效  
諸醫等自初至終恬嬉玩愒前夏議藥設廳  
之時甚戲狼藉不輟外方諸醫雖有意見首  
醫終始力排使不得有無於其間請首醫崔  
聖任絕島定配其他諸醫並命邊遠定配  
上批曰古人云死生有命凡人壽夭莫不在  
天况帝王之尊欲專咎於議藥之諸醫此豈  
理也哉不料爾等以有識士夫乃有此舉也  
昔唐之懿宗以公主不起多殺醫人皇明  
馬后臨崩戒以勿妄殺醫者二事孰是孰非

予屢語于內殿曰以堂堂國家之尊而輒歸  
咎於太醫實非君子達理之道既往之事非  
予敢言而當自我作始必革此弊內殿深服  
予言今茲削罷初頗持難姑從近例今觀啓  
辭措語至深其意不但在於事體而已於予  
心大有所不服且甲寅秋侍藥醫官等雖彼  
編配不至於絕島蓋絕島乃死律之次也藉  
令諸醫有可罪寧有加於甲寅秋之理乎輕  
重倒置莫此為甚尤極未安而以外方諸醫  
不得有無於其間等語觀之則此啓之發可

知其所以從來矣亟停勿煩○冬十月下備忘  
記曰嗚呼眇予否德臨乎兆民二紀有三載  
而所以為多不善以致天怒於上民怨於下可  
怕之灾式月斯生土崩之患迫在朝夕夙宵  
危懼不遑寧處迺者乾文示警灾咎非常未  
知何樣禍機伏於冥冥而昨歲震電之變今  
日妖彗之異若是其疊見層出耶漢儒董仲  
舒之言曰國家將有失道之敗天先出灾害  
以譴告之不知自省又出恠異以警懼之噫  
天心仁愛降灾警予而惟予不明莫知省愆

故其所以丁寧反覆如此若何而少答天譴  
而挽回國勢耶予於此一倍兢惕罔知攸措  
承旨代予草教宜自政府廣求直言以匡不  
逮嗚呼今茲致異實由不辟而亦豈無交相  
儆戒之道乎咨爾大小臣僚割斷已私務盡  
實協毋或玩愒奉法率職用體予宵旰之憂  
政院請勿代草直以聖旨布告中外再啓始  
允之○下教曰自今著為邦家之典不得以  
嬪御登后妃

國朝寶鑑卷之五十一

國朝寶鑑卷之五十二

肅宗朝十二

**壬午**

二十八年春正月

上詣明陵行奠酌禮

世子及陪從百官皆以喪服陪祭左議政李世白言揚州高陽陵寢最多而高陽之於揚州殘盛相懸高陽八陵足當揚州十陵曾幸揚州時本州田稅特命永減故高陽之民亦望一體減稅矣上命高陽田稅亦自今年永減以示軫恤之意仍使本道道臣分付于民人等○夏五月三陟營將李浚明倭譯崔

再弘還自鬱陵島獻其圖形及紫檀香青竹石間朱魚皮等物鬱陵島間二年使邊將輪回搜討已有定式而今年三陟當次故浚明乘船于蔚珍竹邊鎮兩晝夜而還歸○六月備局引見時上曰我國良役苦重雖非立談間亦可變通者而更勿一向因循擇宰臣一人使之專管從長變通可也○秋七月上下教曰噫士生斯世幼而學之壯而欲行之自非果於忘世者豈不思所以展布其所蘊耶予之前後敦召非不勤摯而固守東崗

之陂不肯幡然而起實由於緇衣之誠不承權輿之致缺然慚恧何嘗少弛于中也矧今灾沴頻仍國勢岌業寤寐思賢此時尤切噫啓沃寡躬輔翼春宮任大責重則微今日養德林泉夙負重望者果誰當之乎須體如渴之志亟回若澆之心賁然造朝勉副至望事遣史官傳諭于贊成尹拯贊善權尚夏○上下教曰太廟五享大祭親行載在五禮儀而此則雖難一如禮文以禮意推之一年之內只行省拜於歲首心有所未安從今春秋省

拜事定式舉行禮曹以七月展謁事覆奏定式○八月 上下教曰咸鏡道物膳及江原道朔膳特為限明秋減半以示軫恤之意以年事失稔故也○備局引見時持平李東彦啓曰國朝故典第宅自有定制而末世奢侈競以峻宇相尚上自衣冠士族下至閭閻下賤工作不輟傑構星布觀瞻亦侈俗尚可惡請嚴飭京兆及五部凡諸侈濫家舍土木營作之舉一並禁斷 上曰依啓又言國朝諸宮家宅制昭載法典近日諸宮家家空間架

之廣濶棟宇輪奐之奢汰將無限節宮家如此則何以禁士夫之踰制士夫如許則何以禁庶人之僭上請自今以後諸宮家家宅勿論後宮親王子一並依倣舊典務從節損無踵前習如或有違越過制者自法府直為推治其主事董役之人以為稍振紀綱之地 上曰諸宮家第宅之過侈予亦以為不可曾見寅平尉宮家舍廣濶子孫亦難保守予意亦嘗如此今後另加嚴飭而第宮家營建例自該曹董役則主事推治一款有不可施行

國朝實錄卷之五十二  
三  
矣○九月 上下教曰國以民為本民以食  
為天而不幸今年水潦之災振古所無陵谷  
變易田疇蕩然秋成已屆生意索然明春填  
壑不言可想念及于此若恫在躬儉歲調賑  
之策在於方伯方伯若體宵旰之憂申飭守  
令孜孜賑政撫摩安集苟涉便民劃即條奏  
則庶有着實之效以此下諭于諸道監司而  
至於畿甸根本之地理宜優恤前頭災實分  
等啓聞之後別為蠲役以示予如傷之意○  
命賜明禮宮及故明善明惠兩公主房各錢

八百兩俾補祭需承旨李健命啓曰此等賜  
與雖異閒漫費用之比而屢歲災荒經費蕩  
竭今此三處賜予有乖遇災節省之道 上  
命各減三百兩

癸未二十九年春正月 上下備忘記曰昔漢  
文帝當海內寧謐之時每下朝令輒軫元元  
則矧惟今日八路民斯纔經饑癘尚未蘇息  
而荐罹昨歲之災荒重以身役之侵困方春  
發育枯爰亦被乾坤之雨露而哀我無辜之  
民獨阡於死亡為民父母當復如何噫農者

天下之大本民所以恃生則凶歲勸農尤宜着力其令有司之臣體予至意毋或玩愒凡所以調賑也勸農也常加留意另為申飭無使民有指瘠田有不闢仍念君之於民猶父之於子也子有沈痼之疾而為其父者安有立視其死而不為之汲汲救護乎目今生民莫保之憂無如良役軍制而一日二日徒思遷就不思濟民於水火之中是豈子視萬姓之道乎予實慨然也宜令廟堂趁茲新春須速善變導迎和氣用示予如傷惻怛之意○

上下教曰安不忘危有備無患有國之急務目今災異疊見憂虞多端都城至近之地虎豹恣行虎者兵象也綢繆之策不可少緩分付將兵之臣各別舉行○二月平安道寧邊人金後男殷山人咸貴玄以其族役之難堪至於自縊觀察使李世載以其事聞上曰事甚矜惻本道各別舉恤典仍念人之所惡莫甚於死而有此自縊可想其役重難支之狀不可不急速變通少紓民困令廟堂稟處世載又以陽德人朴明益等五名飢死事狀

聞仍待罪 上曰事之驚慘莫此為甚卿其須勿待罪嚴飭賑政使赤子免填壑之慘○引見大臣備局諸臣行司直李寅燁曰都城流丐招見後區處之意頃已陳達矣分付五部聚集各道流民則多是實民舉家流徙非如曾前一二人轉乞之比而其中亦或有萎黃近死之類臣諭以諸道皆已設賑自京又移轉穀物若還本土庶有生道而流離失所不即還歸則終不免為填壑之歸且春耕已迫歸事東作亦有前頭資活之道如欲還歸

當計程給糧云則願歸者頗多計給其糧醬而送之未知幾人果能還歸而厥後緦屬而至其在王政不可忽視而從前設粥終無實效羣處衆聚熏染成疾故今春則以不復設粥已定奪而流民無所控訴仰哺於京師則亦不可無接濟之道臣意則抄其壯實者給糧還送使其本邑給種作農老弱之難於還歸者定領將分屬使之監賑而課其勤慢加以賞罰則似勝於設粥之有弊或分送於數十里內畿邑自京倉計日給糧時送京官摘



國朝實錄卷之五十二  
六  
奸則亦似着實而至於各軍門所屬令該軍門接濟則庶不至於顛連道路矣 上曰大臣之意何如右議政申琬曰區處之道誠難矣歸其本土則似好而率去之時必有道多逃亡之患分送畿邑則畿邑亦殘弊必有主客俱困之患 上曰諸臣之意何如諸臣所對大抵與寅燁議同而副提學金鎮圭獨陳其不可刷還之意 上曰以宋朝事觀之富弼知青州時設賑設粥各盡救民之策我國則從前設粥終無實效即今飢民專恃京師

扶携上來若給乾糧則四方流丐聞風而集國力亦不贍實無善處之道李寅燁之言甚善壯實者還送本土老弱無依之類分送畿邑以為接濟之地而分付列邑畢賑後所送流丐死生形止使之啓聞鎮圭曰凡為守令者若盡心於賑事則邑民亦有所恃而不至於大段流散若分付各道流民數多之邑當查覈論罪之意申飭則亦或為一助 上曰何邑飢民多耶寅燁曰兩西關東畿甸之峽民舉皆上來而其中畿甸海西尤多矣 上

曰守令不能盡心以致民散流民尤多邑則  
 守令別為論罪○三月嶺陽君保妻平雲君  
 休妻 宣廟孫婦也時年八十特賜食物錦  
 溪副守惟明年九十命陞明善階且命宗親  
 府抄出貧寒宗臣優加周恤○夏四月奏請  
 使行還到義州中江驛卒五人溺死 上聞  
 之驚惻曰驛卒雖微賤萬里往返纔到我境  
 不意滄沒良可傷也鴨江豈是敗船之地而  
 本府以朽船濟人致有此患府尹洪璠先罷  
 後推仍命本道優恤滄死人○六月 上下

教曰關武安王精忠大義昭如日星皇明  
 太祖皇帝肇初壽亭侯廟天下都邑莫不立  
 祠崇奉之意槩可想矣我國崇禮門外即壬  
 辰遊擊陳璘所建也其時我國出財力以助  
 之廟成 宣廟亦嘗親幸予於頃年拜陵時  
 歷入東廟蓋其忠義之氣令人感慨於千載  
 之下 宣廟臨幸予之歷見皆非出於遊觀  
 之意也聞南廟安生像明日舉動歸路欲歷  
 過其令禮曹稟處禮曹請依辛未年例以舉  
 手揖定儀注從之○秋七月禮曹以 仁顯

王后再暮後 王世子即吉節目磨鍊以啓  
傳曰噫父母之喪二十七月而除乃古今不  
易之制無貴賤一也今此即吉之文雖非禮  
官之臆斷予以為未安也內喪在先則十五  
月而禫禫後變除已是壓屈之意何必再暮  
纔過遽用純吉自同平常哉此實非人情之  
所安而世子之心亦復如何予意以為仍持  
心制至十月而即吉庶不悖於禮經而可無  
憾於人情問議于大臣及左贊成戶曹參判  
亦令儒臣博考典禮以稟弘文館啓杜氏通

典云王儉古今集記云心制終二十七月又  
稱宋孝建二年諸公主心禫素衣二十七月  
乃除近世文敬公全集所撰疑禮問解續編  
有問父在母喪十一月練十三月祥則心喪  
之服當除於何時除於何所耶或云當依通  
典哭除於再暮之月晦或云當除於禫月或  
云當除於丁日妄意當二十七月之朔以吉  
服入廟參禮而喪畢飲食處常之節在於此  
時遇仲月行祀後當有復寢之禮未知如何  
集曰鄙意古無變除之節既曰心本非服也

何變除之有若除於再暮則心制果盡於再暮乎禫月丁日猶之可也而終不若待吉祭之期而復常無事於變除而自為變除之為當也臣等竊惟聖人緣情制服有壓有伸內喪在先十三月而祥十五月而禫者明無二尊之義也禫後心制以盡三年之期者達孝子之情也即禮所謂禮殺而情伸者也蓋周而練再周而祥禫而纖徒月樂此固三年之體而變殺之漸也壓屈之服雖止十五月而先王之禮既有心喪之制則當待禫纖徒月

樂之期即吉復常方盡於天理人情矣王儉之說孝建之制皆得此意至於金集荅問之書尤為精備雖非論王朝禮制達喪之義可通上下然則心制即吉當在吉祭之期 王世子心制若除於再暮之日則是不能恰倣三年之體而無以盡殺禮伸情之義矣禮曹遣郎官問議于大臣儒臣判府事尹趾善議既練而祥既祥而禫仍從心制以終三年即有 先朝已行之禮以情而言雖無窮已以禮而論自有限節今於再暮之後全無變除

之節猶持心制則即係創制有難輕議今世士夫家父在母喪者雖再暮後不敢自同恒人此則私自致其餘哀而已既非典禮所載則今乃擬議於王朝儀制未知其合宜也判府事徐文重議公家典禮臣未之詳而以大夫士通喪之制言之則禫月既已即吉飲食之節亦隨而變或有有除命行公者可以推而上之也今日王世子之服特以無禫之故仍持心制過初丁之期以盡其月則又有重於中月之制恐非禮家之本意也右議政

申琬議禮官所上儀節乃據乙亥已行之例此所謂喪制從先祖者而第暮禫變除則古聖人制禮之意出於隨其禮節有所降殺也即吉與否惟在於緣人情之所安而行之也士大夫父在母喪雖在再暮之後不敢以無禫而徑先服吉從仕者誠以禮雖有節情有所不忍也父母之喪自天子達於庶人可推而上之也聖教允當領府事尹趾完議該曹儀注明有援據無以議為第聖上體諒世子情理欲為變通則似無不可士夫家為母

心喪之人再暮後雖從吉而不服華盛之服必待中月始乃服常其在從義之道不害采用此禮判府事崔錫鼎左贊成尹拯辭而不對戶曹參判權尚夏議伏見下該曹之教參酌於天理人情者可謂無所間然且得見玉堂所改進之說又可謂不易之論復何容愚淺之見犯僭汰之譏哉伏惟上裁 上下判付曰再暮後世子仍持心制至二十七月而即吉可也禮官復言即吉時別無卜日行祭之事來十月朔祭 王世子以黑團領將事

祭後着吉服還宮似合禮意從之○上謁太廟 上嘗以只行歲首省拜心有所不安命以春秋省拜為永式至是消吉展謁○八月上猝然不豫宵隔痞塞急招諸醫闕內洵擾提調李濡金字杭蒼黃入侍受灸良久始少定字杭私問醫官曰此何症也曰疝氣也上曰自數年來此病已成根抵初覺微痛不料轉至此境矣 上又歎曰凡人寢食各有其時而予則不然性度不能寬緩凡事不欲拋置文書之出納者必數三遍閱聽斷無滯

以致午後始食夜分不寐火疔日熾以至於此予非不知病根之所在而亦無奈何耳濡等陳戒請安心靜慮寢食以時 上不荅○冬十二月 上命行 延祔君冠禮于瑤華堂賓以正二品贊以從二品差出視世子冠禮減一等禮曹撰定節目而以事無前例依做世子冠禮有所差等既而禮曹以節目就議大臣判府事徐文重議親王冠禮詳載集禮會典而五禮儀則闕焉該曹既無謄錄之可據則事是初行所宜詳量禮法明白定式

而行禮處所定于瑤華堂臣以為未安也蓋成人之禮始於三加故有冠于東序序外之別醴于戶西冠所之不同所以嚴名分而明等威也 王世子冠禮亦且行于東宮則今獨不行於私第而行於大內別堂豈非失次之大者乎厨院設醴尚方陳服一依 王世子冠禮之儀雖曰差等安得無混逼之嫌也該官之親自進排自是小節何足言也臣既承未安之教悚感之不暇而今承問議略陳淺見左議政李會議皇朝會典皇太子冠禮

行於奉天殿親王冠禮洪武定行於王邸成化更定於奉天門前東廡今王子冠禮行於大內別堂臣愚以為未安也以洪武所定觀之私第固為其所雖以成化更定者言之宜不在於大內則明矣設醴陳服該曹既改其節目今無可論該官之親自進排自其任耳此則未見其為嫌也且考大明集禮皇太子冠則三公一人為賓太常卿為贊親王冠則禮部太常官為賓贊云太常官之非卿則決矣而所謂禮部官亦非必尚書也贊本賓

之從者所謂太常官無乃博士之屬耶若然則今之以亞卿為贊亦似過重既有所疑敢此並陳他大臣病不獻議傳曰冠禮處所定於瑤華堂之後不無疑訝取考會典則大內別堂有所未安方欲參酌變通矣大臣之意亦如此處所定於通化門內東月廊賓以從二品贊以從三品差出禮曹又略改節目以啓○上親政面諭政官曰守令係生民之休戚凶歲主賑其任益重要在得人而任之昔唐帝題名殿柱今予親政之日尤宜惕念慎



擇也又曰賊吏河海雲李文海尹以寬崔益望等負犯至重而予之不從臺啓特以赦宥之後不必更罪也然或調用如舊則人將無所懲畏更勿備擬於守宰之望

**甲申**

三十年春正月下備忘記曰國家不幸一自乙丙大殺戊己毒癘之後若經兵燹民未蘇息加以三歲懷襄災害非常八路荐饑西北尤甚哀我民斯大命近止如傷之念非不切於九重而奈此積儲之蕩然何中夜焦憂不知所以為計也然誠之所存無事不成今

日君臣上下苟能以誠心着意賑事則亦豈無濟活之道乎內而主賑之臣外而御史暨方伯體予惻怛之意講究荒政孜孜不怠而畢竟以捐瘠之有無明示勸懲之典宜各勉旃仍念客歲孟春以良役變通事特下備忘意非偶然而一年已盡了當無期赤子倒懸之急何時可解耶予實慨然咨爾釐正諸臣亦自惕慮無如前日之悠泛俾有及民之實惠至若勸農在常年猶為急先之務况歲惡民饑之日乎申明事目令民力穡無使田野

不闢○命嚴禁各軍門直定軍役及京司書  
吏受賂之弊從諸大臣之言也○夏五月  
上避正殿下教曰今日國事可謂岌岌乎殆  
哉上天警告而可驚可愕之變式月斯生下  
民困悴而饑饉扎瘡之慘無歲無之朝論日  
乖有腹心先潰之憂盜賊日熾有一朝土崩  
之慮而文恬武嬉惟事玩愒委靡之勢漸趨  
危亂當寢忘寐臨朝興歎實無南面之樂也  
然而日夜祈願惟在於稽事之稍登赤子之  
蘇息矣奈之何天不悔禍蘊隆之灾又至於

此耶圭璧既卒而冥應猶邈責已親禱而微  
誠未格一霈終靳萬彙焦枯今不雨大命  
近止罪在一人何辜于民嗚呼否德忝位三  
紀于茲而使吾民未見奠居之樂每有化離  
之歎靜言思之尚寐無吡承旨代予草教宜  
自政府廣求直言以匡不逮言雖不中予則  
優容嗚呼今茲名灾亶由無良責勵臣隣徒  
切愧慙而君臣之間貴在交修則其可無一  
言乎目今可虞之端固非一二而切急之憂  
孰有過於國事之泮渙耶然其所以泮渙者

蓋黨論致之也論議分裂門戶各立一室之內戈戟相尋朝廷之上風波日激禮讓蔑聞傾軋成習大臣卿宰席不暇煖或躑躅引入或蒼黃迸出曾無一日安其位者百度渙散爻象不佳尚安有聚會精神挽回世道之望乎予以為此弊不去終必亡人之國寧不大可懼哉大抵君為四方之標準則使黨論至此者誰執厥咎亦宜反省懋我建極咨爾大小臣僚自乃祖乃父事我列祖勤勞王家卿等俱以世祿義同休戚遭此板蕩之辰痛

革朋比之私一乃心力盡瘁後已則默想祖宗在天之靈必悅豫於國事之庶幾而卿等亦皆濟其休矣豈非邦家之福哉欽茲多誥毋替予命少荅天譴弘濟時艱減膳撤樂禁酒等事令該曹舉行政院請勿代草以聖教播告中外上謙讓不許再啓始從之仍命連設祈雨祭○備忘記曰為民祈澤已至五次而視天夢夢雨意邈邈節序漸晚民事愈急曷惠其寧憂心如悛第念牲璧既遍羣祀嫌瀆其在靡不用極之道豈可默然而已

先農親祀禮文攸載於赫神農后稷肇我稼  
穡萬世以賴用祈康年享祀是虔祈年寔為  
穡事祈雨亦為穡事則更竭菲誠代犧親禱  
不容少緩也其令祀官問于大臣判府事尹  
趾善議農壇祈雨雖無五禮儀所載既有已  
行之例則至誠虔禱不無冥應之理判府事  
徐文重議古之帝王如殷湯之桑林宋帝之  
太乙皆能感回上天以致千里之雨惟在盡  
我誠敬而已亦何處所之有常第藉田是祈  
穀之地歲首行禮以祈有年風雲雷雨祀於

南郊以資振發膏潤之功均是為穀各有所  
主禮不可相錯與其初行新規不若循古禮  
克舉南郊之禮左議政李會議神農后稷寔  
肇稼穡五禮儀雖無祈雨之文曾在丁巳亦  
有已行之例至誠虔禱恐為得宜命以二十  
二日親禱先農而節目一依南郊動駕時藥  
房以東郊癘疫熾盛啓請攝行荅曰今茲親  
禱出於悶旱靡不用極之意雖有癘疫不必  
拘忌決不可攝行矣○夜二更 上乘小輿  
出興仁門詣先農壇去前後鼓吹侍臣儀節

減旗仗軍兵下教曰壇所近處禾穀若致踏損則有非祈雨本意各別申飭又禁南草酒醪○六月復遣重臣禱雨于龍山江楮子島上親製祭文曰漢水西流寔為龍江有禱有應以佑我邦云胡今日久閔膏澤夏序將盡赤魃猶虐川渴澮涸四野無青農夫啜泣廢輟耘耕夙宵遑遑錦玉何安請命太室嬰茅農壇靡神不宗神不我惠神豈不仁予實獲戾噫嘻台灾亶由不辟追愆省尤不啻十百我知我罪敢追罰責赤子何辜替罹荼毒若

過旬月民靡孑遺民其盡劉國將奚俵予念至此不如無生神其降監寧不盡傷更遣重宰虔薦牲幣亟垂冥隲千里一霈又曰瞻彼楮子宛在水中夙著靈異有感則通今茲亢旱亦孔之酷三農已失萬彙焦爍饑癘餘氓洊遭極無舉將填壑無罪無辜不殄裡祀牲璧既率視天夢夢炎炎赫赫心焉如焚云我無所靜言以思咎則在予予未恤民徵斂多岐予未去奢糜費日滋予未建極朝議乖張予未平獄和氣感傷以予之故致此悔怒且

懼且慚譴罰是甘罪移生靈胡寧忍斯未暇  
緩聲灾急燃眉神之聽之是饗是歆佑我東  
土遙賜甘霖○秋九月初江華留守李寅燁  
以江都合操因年凶久廢不可不趁今秋舉  
行為言至於定期狀聞其後左議政李畬右  
議政李濡以年事失稔謂宜退行於明春寅  
燁又馳啓以為既已釀酒料理師期已迫而  
又復因循擔閣則軍政可慮乃請仍行於今  
秋有不如意者十常八九之語備局回啓云  
明春退行為慮年凶難舉而果若無益而有

害如其狀辭則今秋仍行不妨 上判曰凡  
事不至大段難處則可行者斷然行之不可  
行者斷然不行道理當然而近觀廟堂之事  
多姑息之政無堅持之意論議多端變更無  
常予之慨然固已久矣試以此事言之詰戎  
有國所重沁都係是保障而信地合操廢棄  
多年故頃因留守陳達使之依例舉行及其  
定師期馳啓之後廟堂又有或停或退之議  
朝家舉措有同兒戲故已示未安之意於前  
席矣合操元非必難行之事而猶且持疑顛

倒至此則何事可做乎從今以後凡事量其  
可否既定之後毋或數數變改

國朝寶鑑卷之五十二

國朝寶鑑卷之五十三

肅宗朝十三

**乙酉**三十一年春正月備忘記噫民惟邦本本  
固邦寧而比歲荐饑民方殿屎夙夜一念未  
嘗不在於懷保也矧當新春東作不遠撫摩  
安集勸課農桑固皆急先之務而至於三南  
被災最甚之處著意濟活不啻暑救焚拯溺  
也其令廟堂另飭道臣用體予軫恤元元之  
意若夫軍制朝家稍加釐正節目纔頒中外  
諸臣遵而不撓少慰軍民之望○二月備忘

記治獄所係皆士大夫也雖有罪下吏朝家待之宜乎有別而遭親喪而不得自盡人子之至痛如何此正為人上者所宜惻然動念處也自今定式死囚外限成服啓稟保放時林川郡守尹寔在囚遭母喪而不得出承旨以此陳達于筵中 上惻然許其出見仍有是命○益山幼學蘇德器上疏稱 上功德請上尊號答曰嗚呼眇予否德忝位以來天怒於上而饑饉荐臻民怨於下而倒懸莫解加以朝無和靖之望國有泮渙之勢夙夜憂

懼罔知攸濟矣前後草野之疏請出於萬萬意慮之外每聞此言只增愧慙寢食不安也昨幸禮判金龜 以此事有所陳稟而竟不許即書予懷于小紙矣今以此出示者欲使羣下知予志之素定而非出於一時撝謙也仍封下御製詩曰否德承丕基于今廿九稔歲連瘁稼穡民屢奪餬飪國事維其棘天灾日又甚休提稱慶說但自夙宵懍○王世子上疏曰伏以臣庸質不敏冒叨儲闈臨淵履冰夙夜憂懼且學識魯莽而猶有一端秉彝之



性愚衷所激不能自抑冒萬死仰陳於冕旒之下伏願 聖明快賜許施焉臣考諸前史歷代帝王已多稱慶之說而至於我朝亦有已行之典仰惟 聖上以聰明睿智累朝闕典畢舉惟明明上天於皇 祖宗默佑聖躬降之秩秩無疆之休臨御三十有二年身致太平八路寧謐黎民安業此實前古罕有也 曾前在廷之臣陳請在野之臣相繼封章 聖批為謙終不允俞臣於此不勝悶鬱之至 噫尊崇君父臣子之至情有不能自已也伏

願 聖明俯從羣下顙望之情宗社幸甚臣民幸甚答曰覽爾疏辭雖出於人子之至情而但念稱慶是何等禮今日是何等時耶災異之荐臻國勢之岌業生民之困窮罔不由於涼德慄慄危懼錦玉靡安願予何心作此豫大之舉乎決不可從也因政院啓稟命承旨傳批 王世子在誠正閣降階跪受留承旨賜酒饌○王世子再上疏曰伏以臣於日者敢陳至情仰干天聰伏承 聖批上畏天戒下恤民困終不允許丁寧開示臣於是尤

不勝惶感悶鬱之至茲將前懇不避煩瀆更  
申於天地父母之前仰惟 聖上英明出天  
洞貫古今而至於稱慶一事深自撝謙臣達  
宵耿耿若無所容而羣下之缺望者又如何  
也噫稱慶之禮古今行之不翅明白則此豈  
出於豫大之舉而然哉誠以一國顛望不可  
不勉從故也况三十年治平前史所罕水旱  
災異盛世恒有奈何以此 聖上過執謙讓  
之德以拂大同之輿情乎伏願 聖明俯察  
微誠快賜允許以副舉國臣民之望千萬幸

甚臣無任激切祈懇之至答曰日昨之批非  
出撝謙須勿強請以安予心○王子延初君  
諱 與宗室二品以上聯名上疏曰臣等俱以  
瑣質忝屬璿派涵育至澤保有榮貴若其事  
有關於國家而永有辭於後世則豈容舍嘿  
以負我 聖明哉臣等竊伏惟我 殿下以  
上聖之姿統承丕緒于今三十有一載矣敬  
奉宗社而聖孝著撫育黎元而人心悅間或  
有水旱饑饉之灾而夙夜憂勤若恫在躬其  
所驚懼拯濟之策靡不用極環東土含生之

國朝寶鑑卷之五十三  
類咸彼其澤各安其所此實我國家億萬年  
無疆之休矣臣等考諸往牒察以時事稱慶  
之舉斷不可少緩前後韋布之疏請近日廷  
臣之陳白蓋倣皇朝故事我兩朝已行之  
典則此固終不可強拂者而伏見日昨王  
世子瀝血陳章辭旨懇摯誠孝之出天有足  
以感動神人舉國臣民莫不懽欣鼓舞思見  
盛禮之亟舉而聖旨撝謙不賜允俞以  
殿下止慈之聖何不諒春宮抑鬱之懷耶羣  
下之缺望至此而極矣噫謙謙聖德固不敢

容議而尊崇君父是臣子愛戴之至情不避  
猥越敢引先朝盛典相率仰籲伏願亟從  
王世子肝膈之懇以副臣民顙望之忱不勝  
萬幸荅曰予以無德遭茲多難恒切憂懼不  
遑寧慶萬萬不敢當之請前後繼至只自慙  
恐無以為諭決不可允從也仍傳曰遣史官  
傳諭○王世子三疏申請稱慶曰伏以臣再  
上疏章冀蒙照燭而天聽邈然至以須勿強  
請以安予心為教臣徊徨闕塞益無所容措  
噫人之所欲天必從之仰惟聖上以天地

之仁日月之明猶不察其至情而遂其忠懇  
此罔不由於臣之誠意淺薄不能感回天心  
而然也臣雖至愚豈不知一向煩瀆之為未  
安而至情所激不能自外於仁覆之天更申  
呼籲於宸嚴之下伏願 聖明恕其僭猥而  
更加省察焉夫尊崇之節於前史有可據之  
文在今日為必行之禮而尚此遲延迄未得  
請抑或以重其事而然歟惟其重也故廷臣  
據例陳請韋布亦曰可行則人情所在此而  
可見睿鑑孔昭臣不必贅陳而輿情不可終

佛羣望不可終孤也明矣惟我 聖上孜孜  
圖治三十年功被八路萬品得所此豈非  
祖宗積德累仁之基歟邦國之慶無過於此  
稱賀之典決不可已伏乞 聖明速許允俞  
上以慰 祖宗默佑之靈下以荅臣民顯著  
之望千萬幸甚臣無任瞻望懇祈之至荅曰  
前後疏請已諭予意斷無允從之理也○判  
府事徐文重平川君申琬左議政李畬右議  
政李濡戶曹判書趙泰采刑曹判書姜鏡司  
直閔鎮厚右叅贊宋昌禮曹判書尹世紀兵

曹判書俞得一左尹金錫衍韓城君李基夏  
同知中樞李宇恒工曹判書李光迪禮曹參  
判俞集一齊會賓廳請遵 中宣兩朝已行  
之禮稱慶陳賀荅曰日昨草野之疏以此事  
陳請也竭所蘊而諭之仍以頃年書懷者出  
示夫詩言志苟有一毫勉從之意則必無此  
述作雖有述作必不頒示羣臣矣世子三疏  
懇請而不許矣卿等於此可想予志之牢  
定而猶且陳請不已竊自愧情志之不孚也  
且啓辭中所引 中宣兩朝事尤有所萬萬

不敢當者噫惟我 聖祖業煥中興功存社  
稷而以太小子之薄德猥自尊大安而受之  
則古今天下寧有是理自有此請以來忘寢  
與食殆不自定而今日上天之示警亦安知  
不由於此耶卿等體予肝膈之言亟停無益  
之請使予心少安○三月備忘記事作於下  
象動於上自古灾異之作皆由於人事之失  
而莫非上天仁愛之心也為人君者遇灾而  
不知自省則禍亂隨之可不懼哉自予忝位  
以來非常之變式月斯生夙夜危懼不遑寧

國朝典章卷之三十三  
處矣正當季春之月生意方盛陽氣發泄勾  
者萌者畢出盡達而大雪彌日日候寒凜殆  
同閉藏之氣象春行冬令其應不佳未知何  
樣禍機伏於冥冥而天之示警若是其丁寧  
耶究厥所以宜由否德倍切憂懼若涉春冰  
也噫今茲咎徵自有所召惟當反躬改愆之  
不暇而第念目今切急之憂莫大於朝論之  
潰裂故前後勅勵出於至誠而積痼之疾救  
藥未易若此未已聚精會神專意國事杳無  
其望豈非可愕之甚者乎噫上下雷同非國

家之福則予非以此責望也大凡論事之際  
各執公心可否相濟而痛祛傾軋之習則朝  
著和靖而岌業之國勢庶可挽回矣予之冀  
望實在於此也咨爾大小臣僚體予交修之  
意務盡寅協之道少答天戒○夏閏四月  
上詣敬寧殿行奠酌禮 王世子陪從祭文  
曰驪興毓祉篤生碩媛秉心淵靜稟質柔溫  
行成鬢鬢訓襲法門簡膺 慈旨禮隆大婚  
祗事 兩宮愉色承歡同予儆惕不替箴言  
六載瑤華慙悔何極重莅長秋天道必復履

險愈和淑聞彌彰視如已出撫育元良蓋其  
天性非假飾為漢有馬后后德近之曼壽宜  
享遐福永綏那意魅變禍酷中闡誅討雖伸  
幽明曷慰予愴若新予念未已積痛少洩義  
理猶晦世道至此寧不愧慨流光荏苒幾閱  
星霜追思疇曩德音不思消吉揭虔躬拈瓣  
香入瞻靈殿悅接容聲孰知予懷有隕沾襟  
不昧者靈尚冀格歆 上所親製者也○冬  
十月 上以八路饑饉下備忘以示隱恤之  
意其略曰近歲大侵加以水旱蟲雹風霜之

灾八路狀聞罔非傷心方當秋節民已乏食  
來春之事可推而知惟彼無辜將填溝壑而  
公私赤立府庫如洗念及於此若之何其寢  
不安席食不下咽民之於君猶子之於父豈  
可諉之於無可奈何而立視其死歟為道臣  
者正宜晝思夜度汲汲區畫為守令者竭力  
盡心多般拮据至誠濟活至若閩帥邊將郵  
官亦自有管中軍卒宜各調恤俾免顛隳予  
俟賑政之垂畢分遣繡衣廉察勤慢以明黜  
陟之典或有貪官污吏肆然入已者繩以重

律斷不饒貸咨爾按道之臣明聽心腹之誥  
劃即宣布毋孤予委任策勵之意灾荒最酷  
之處不可不別遣監賑御史用示朝家另加  
軫恤之意而兩南江原道朔膳及京畿咸鏡  
道物膳依前凶歲裁減限明秋姑減○備忘  
記士習之偷薄未有甚於近日大小場屋曾  
無一番安靜之時泮宮賜柑輒有爭相攫取  
之弊此或由於隨從濫雜之致而士習之不  
古亦可推而知矣噫為人上者教化大行則  
濟濟之美雖不敢望今日士習必不至此厥

咎誰執予甚惡焉其令大司成思盡教胄之  
責稍變士子之習○藥房問安答曰噫火與  
元氣本不兩立予之火疝向衰益痼五六  
年間頓覺肌膚日就消鑠其勢必漸至焦枯也  
噫凡人死生所關孰無顧惜之心昨年藥院  
之批寫盡切迫之狀知我者謂我深憂不知  
我者謂我倦怠此非些少文書之省減所可  
得力亦非區區陳根腐草所可責效也若不  
遵依 祖宗朝故事居閒調養則實有難言  
之憂予之有此志固已久矣至於今日益決



矣○傳曰禪位國之重事宜有節目其令禮  
官舉行○判府事徐文重崔錫鼎平川君申  
琬右議政李濡來詣賓廳啓曰伏見備忘記  
臣等聚首錯愕罔知所措惟我 聖上春秋  
未到倦勤之時調候漸臻康復之境雖有火  
熱上升之氣願神養性自有清泰之福而還  
下居間調養之教繼又有節目舉行之命非  
徒臣等之遑遑罔極一國萬姓莫不失色而  
觖望矣雖以 祖宗朝故事言之 太宗禪  
位之日聖壽五十有二 世宗受禪之年已

至二十有二我 殿下既未及 太宗之年  
春宮又未及 世宗之歲則今茲聖教豈不  
有乖於遵 祖宗故事之意哉答曰噫今日  
此舉實出於萬不獲已豈樂為之哉夫火之  
為症異於他病而逐年增加及覆沈痼若不  
決意居閒頤養精神則實有難言之憂今日  
此教亦云晚矣君臣猶父子何語可隱今茲  
禪位凡再草藁而再焚藁蓋世子年幼有所  
遲待故也今則世子年既長成予之火症漸  
就難醫強而行之必有後悔欲專意調養則

國朝實錄卷之三十三  
有妨公務到此地頭釋位之外更無他道此  
非特顧惜一身而已乃所以為國事也不然  
何苦而必欲屣脫萬乘乎所引 祖宗朝故  
事有所不然者使予無沈痼之疾雖過知命  
之年不必禪位豈以年歲之早晚為言哉○  
大臣率百官伏閣啓曰昨於聖教之下不計  
深夜敢請入對不賜允俞臣等聚首相顧心  
焉如割若其父子君臣之諭奉讀未半不覺  
涕淚之交頤也今日諸臣苟可以仰承明命  
其何敢更有一言而臣等有死而已決不敢

奉承惟 聖明之垂察焉聖教每以疾病為  
辭臣等不暇遠引前事恭惟我 先大王沈  
年痲疾寧日恒少豈不欲謝絕萬機逍遙晚  
歲而上念宗廟付托之重下軫 聖明之冲  
年又不欲遺大投艱以妨緝熙之工倦勤之  
意終不形於辭色勤民敬天十五年如一日  
此所以盛德至善沒世不能忘者也若 祖  
宗朝故事則或創業垂統大命方新或治成  
制定方內乂安雖脫屣萬乘超然自在軍國  
大事尚多稟決使憂虞溢目國勢危弱有如

今日者 太祖太宗必無是事矣嗚呼天怒民窮正有救焚拯溺之憂 殿下雖欲相忘必不可得既不能忘而徒有其名亦何益於聖躬哉又况國事愈急則 殿下其可曰我已閒養而不知乎惟彼顛連溝壑之民亦且望絕於乳哺之仁相與飲恨而死此豈臣民仰戴之望也噫勞而思逸人情之所同然疾病之際尤難耐事 聖上今日之教亦或由此臣等每瞻天容非復昔時區區之憂曷有其極常願 聖上清心省事保攝精神而不

幸國內薦瘥朝著多故聖心亦憂勞過分激惱多端或夜分不寐過時忘食本源之地或未澄澈榮衛之損日覺遷謝不免躬自憂傷屢詔於保護之臣臣等每聞此教心肝若墜臣等忝居股肱使吾君獨憂而成疾此其罪雖萬死何惜然而人君以一人之身下應萬事苟不能居簡以制煩鮮或不至於心勞日拙之患况精神有限亦何能不困弊凋耗也是以秦皇之衡石程書隋帝之衛士傳餐前史譏之古昔聖王之雞鳴待朝日中不遑者

豈獨為煩文細故枉勞心神也其所以無大  
疾病歷年長久者正得治心之術也苟心志  
不固則不可以自強而耐煩至於陰陽之患  
似若無與於此而古人以洞房深宮為寒熱  
之媒善乎子產之言曰君子有四時朝以聽  
政晝以訪問夕以修令夜以安神於是乎節  
宣其氣不使有所壅閉湫底有忠慮於其君  
者其憂疾病之言如此 聖明誠能澄治聖  
心常如止水明鏡物來順應無所將迎治心  
治病兩得其道細故煩文在所當略事雖小

滯神疲則止凡可以拂心橫慮者無使怙懣  
宴息飲食不失其時則必不至於勞心生火  
又何必過自憂勤還有此舉也自有此教大  
小驚駭萬姓奔走一夜之間滿城鼎沸人心  
之所驚愕即天意之所不安夫以 聖上之  
明睿所照豈可上違天意下拂人心獨行而  
不顧以負此萬姓百工若離父母之心也伏  
乞收還昨日藥房批旨及節目舉行備忘宗  
社幸甚荅曰予則本無治心之功而常見士  
夫之多蕪劇務者必致傷斁此亦無治心之

功而然耶凡疾病之中最難治者火證也積  
歲沈痼肌膚消鑠終得全安者未之聞也予  
則實有死生之憂而卿等之言若是其悠泛  
反疑予之過慮噫臣之於君猶子之於父寧  
有如許道理耶○王世子上疏曰伏以臣以  
萬萬不肯叨冒貳極夙夜憂悶矣昨伏見備  
忘記實是臣子不忍聞之教臣驚惶煎泣直  
欲無生臣本庸疎無才無德所叨之位已極  
猥越而况此萬萬不敢當之教乎噫知子知  
臣莫如君父臣之無狀豈以 殿下之明有

所不燭乎仰惟我 聖上春秋方富治化方  
隆而今因一時之違豫遽下罔極之教臣自  
聞此教方寸煎熬寢食俱廢咫尺天威敢以  
草草數語血泣仰陳誠未裕天不賜允許一  
倍焦迫罔知攸措坐以待朝席藁天門冒萬  
死更暴而又未蒙允俞臣之情事益復罔極  
伏願 聖慈更加三思亟收下政院之教以  
重宗社千萬幸甚荅曰疏語雖懇予志已決  
斷無允從之理也○十二月 王世子再疏  
曰伏以臣於昨者敢上一疏冀回天心而微

臣草書錄卷之五十三  
十五  
誠未格天聽愈邈至以萬無一從之理為教  
臣奉讀以還肝膽欲墜寧欲溘然無知而不  
可得也茲敢不避煩猥更冒萬死瀝血陳懇  
焉臣賦性至愚無所知識凡於義理全不通  
曉特一鹵莽無用之人耳未知 聖明何為  
而有此臣子不忍聞之教耶臣自聞此教日  
夜涕泣不能自定而况自百僚以至閭巷小  
民莫不遑遑奔走如狂人心所同天意可見  
伏乞 聖慈俯察臣情事之罔極亟收成命  
千萬幸甚荅曰昨者之批已諭予意矣○大

臣又請對 上乃許之政院三司正卿亦並  
請對 上御熙政堂引見 上曰欲面陳者  
何事右議政李濡曰 上常以火證為教臣  
等亦恒深憂而今番藥院之批此豈臣子奉  
承之命耶雖以遵依 祖宗故事為教而時  
勢大異 太宗聖壽已過五十 世宗春秋  
亦過二十則今日下教豈不輕遽乎且 世  
宗中宗御極多年曾無如此之舉 中宗時  
仁宗毓德春宮年踰三十而亦未聞此舉  
仁祖末年違豫有倍 聖上今日之患 孝

廟春秋亦幾鼎盛而未有傳禪之事即今寶  
齡雖已晚暮未及五十春宮雖曰長成亦未  
及二十則何論此事於今日乎判府事崔錫  
鼎曰傳禪是何等重事乎堯舜之事非後世  
可援三代以後自漢以下絕無焉天位至重  
且大祖宗付托之命不可以一時疾恙輕易  
傳授故也 殿下火症源委固非細而至若  
機務之煩豈無省簡之道乎 殿下春秋方  
盛未至晚暮記曰四十曰強古語曰踰強未  
艾之年此則指卿士而言帝王年力固不可

與凡人比而春秋傳曰晉文公在外十九年  
險阻艱難備嘗之矣民之情偽盡知之矣今  
我 殿下臨御三十餘年博極經史明習典  
章羣臣賢否民生疾苦必已洞察無遺此正  
與衰撥亂之會決非居閒頤養之時也自有  
此教羣下煎迫顧不暇論春宮之情理悶迫  
當復如何平川君申琬曰禪位之事堯舜以  
後無聞焉唐宋雖有之出於迫不得已也閭  
閻凡人亦多有火疝者而清心省慮則自可  
差復不可以一時謝事頓然快歇矣臣待罪

保護之時每以頤養之方陳達則自 上以  
為性本如此不能猝改為教矣雖在凡人一  
身為重况人主乎但當刪去煩務以便調養  
矣判府事徐文重曰雖非如許至重之事固  
當詢問處之臣等雖極無狀忝在大臣之列  
而不為下詢遽降此教豈不輕遽乎司直徐  
宗泰以下諸臣各以次縷縷陳達 上曰凡  
人疾病一時寒暑之感易治而積年沈痼之  
疴難治予之火疴源委已久即今年紀衰耗  
肌膚漸鏹股下尤甚所見寒心苟不調養則

不但銷鏹必至焦枯如此則十無一生此非  
一時苦痛之病服藥差可之比也凡病之源  
委輕重他人不知惟當之者知之傳禪批旨  
出於一夜故雖云不意而予之構草已至再  
次顧念春宮之尚幼故再焚而不下今則三  
次而發實非輕遽之事也雖匹夫尚且顧惜  
其身矣強而行之則必致添重如欲調養則  
公務積滯百爾思之終無善策有此下教予  
豈樂為哉非忘國事而然亦非圖便而然也  
予病如此故昨年藥院之批已示此意予則



優游晚年國事自有所托豈非可幸者耶惟  
卿等體諒焉錫鼎曰臣待罪藥院時每因醫  
官有以知 聖上火疝源委矣臣聞傳曰氣  
煩則慮亂視壅則志滯今若省減煩務簡以  
制煩自有其效豈可猝下此教乎人君代天  
莅民民心如此天意可知程頤易傳曰謀從  
衆則合天心古之人君於征伐及法制改定  
事或有獨斷不從衆議者而傳禪何等重事  
其可獨斷行之乎 上曰昨午藥院之批亦  
可見予意實非今日始發事也濡曰 殿下

春秋若至倦勤之年有此教則猶或可矣而  
政當鼎盛之時治化方隆澤及羣生而猝有  
此教故人心無以鎮定矣且此事不得不轉  
聞于彼若以爾君年未晚暮而不稟於大國  
粹然釋負為咎則此亦難處之一端也諸臣  
復申前說再三陳請 上曰帝王家享壽異  
於常人四十曰強云者庶士之謂也堯舜之  
享壽後世不易得昔我 定宗大王四十有  
四傳位于 太宗大王雖未知傳禪因何事  
而春秋則未五十矣今予若無沈痼之病豈

有退閒之意乎一日二日漸至銷鑠實與他病有異亦非醫藥之所可治療也匹夫猶且顧惜其身予豈不念自愛之道乎若以調養為心則公務積滯有妨於國事故昨日庭請之批已悉此意矣若出一時未安之教激惱之事則豈無不平之心而臣下之爭執分義亦然予豈不知乎實由於萬萬不得已而少無相持之意矣諸大臣齊聲而進曰今夜使之登對故冀有一分感回之道矣更鼓已深俞音邈然舉切悶鬱矣上曰他事可從此

則決難從矣大小公事留院者當此大無之年八路民事可慮其中緊關狀啓則入之可也民事不可須臾忘也泰來曰公事雖有入之之教誰可入之乎誰可回啓乎許輝曰非無公事之積滯者而不賜允俞之前何等臣子留意於公事乎今日大臣諸臣相率力爭而不賜允俞他日又不許賜對只以書入為教本院所降批旨封入旋下臣等將置備忘於何地乎今日固當以死力爭何可退去乎仍垂泣吞聲曰世子吾君之子也固當事之

而 殿下春秋今幾許年紀而遽欲遠羣臣  
羣臣之事 殿下亦幾許年紀而豈忍一朝  
棄 殿下乎大臣三司從而力請 上不許  
大臣諸臣以夜深之故姑為請退三司獨仍  
留又力請不已 上終不允○王世子三疏  
曰伏以臣剗瀝肝血再瀆天聽而誠未格天  
俞音尚闕臣益復焦灼置身無所噫惟我  
聖上卅載臨御一心憂勤治隆於上俗美於  
下一國臣民感戴聖德頌祝聖躬將期億萬  
年無疆之休矣不意今者遽下萬萬意外之

教是豈臣子所忍聞者耶自有此教以來心  
魂飛越五情崩裂惟願速就滅死而不可得  
也伏乞天地父母俯察微臣之血懇快收前  
後批旨不勝萬幸入啓後仍伏閣○上引見  
三司大臣正卿政院皆入侍藝文提學金鎮  
圭亦請對入侍右議政李濡曰終日達夜連  
次酬應將來調攝姑不暇言目前紛擾如此  
遑遑罔措矣今又承面諭之命庶幾有開悟  
之望矣 上曰斷不可聽之事連日如是心  
甚不安前後批旨已悉予意更望卿等之體

諒焉濡曰凡治心之法聖賢所貴此實循本  
之言而藥餌扶持亦是一道古者垂衣裳而  
天下治國初只有六府機務甚簡後世繁文  
末節甚多 殿下臨御三十餘年勞神萬機  
不遑寢食求之古昔帝王孰如 殿下之勤  
政哉以此勤勞致傷必多今若別樣省減則  
可無此患而且世子春秋長成侍側之際使  
之觀覽文書參與庶務則自有教誨之益亦  
當有機務之減去者豈不便好哉判府事崔  
錫鼎曰昔文王罔敢知于庶獄陳平漢之一

宰相而不知決獄錢穀之幾何大體豈不然  
乎今若不親細事使羣下裁稟如大段文書  
使世子從傍窺見則有益於教誨之道亦不  
失調養之方矣自 上明習國事通練典章  
若能得人而圖治則君逸於上臣勞於下矣  
傳禪雖有 祖宗朝故事數百年所無之事  
猝然行之則人心豈不驚駭乎况春宮血氣  
未定而意外忽遭此舉豈不痛迫乎昔魏文  
帝傳位於太子宏太子悲泣不已文帝問其  
故對曰代親之感自切于中惟彼夷虜之君

年在幼穉尚且如此以春宮仁孝之心當作何懷耶平川君申琬曰雖以常人言之父兄之事猝然授之子弟則子弟不敢受而行之以此推之豈不諒世子之情理乎古之君有以疾懇欲傳位於太子而乃曰如此艱危之時豈忍貽憂於子孫云爾則今我聖上之心亦當如此而已使春宮不離座側時令觀覽文書則可除聖上一分之憂勤慈愛之情誠孝之心可以兩全其道矣大司諫崔錫恒曰臣等固知今日此舉一則出於付托無

憂一則出於調護疾疾而王世子年纔弱冠學未精熟此正愛惜寸陰涵養德器之時而遽以此艱大之任加之則憂遑煎迫損傷天和其何以發舒志氣成就德器乎臣考見故相臣柳成龍文集則廷請啓辭中有曰羣臣力爭太宗屢發而屢止其文又曰中宗末年亦欲以國政歸于仁宗其時相臣率百官泣血力爭終至回天云昔我太宗之世人心士趨國勢朝綱視今何如而持重難慎尚且如此至於中廟撥亂反正享國

長久 仁廟以生知之資年將三十而因公  
輔之力爭竟寢成命今日臣僚雖不及於古  
人其在 殿下繼述之道獨不思儀刑適追  
之方乎掌令朴行義曰即今大臣諸臣之力  
爭如此春宮之煎迫又如此以至五部坊民  
莫不憂遑古之帝王或有立已見之事而此  
則終不可強拂矣傳曰天下者天下之天下  
非一人之私有故也如此重大之事不可任  
意為之也且聞 王世子日夜煎迫至廢寢  
食伏乞顧念世子之至情速賜允俞持平李

喬岳曰易曰聖入之大寶曰位 殿下所居  
之位即 祖宗之位 殿下決不可輕易授  
受也明矣 王世子年齡未及弱冠氣血未  
至充壯若於遺大投艱之後日夜煎灼損傷  
天和則 殿下之心安乎不安乎舉國遑遑  
人心波蕩如此而何以為國乎 殿下之意  
以為我若不聽則渠當自止而此則大有不  
然者百僚之庭請其可止乎政院之繳還其  
可止乎三司之伏閣亦不可止更加三思亟  
賜允從持平尹世綏曰此舉終難奉行上自

臣僚下至輿僮臧惑如此且王世子將有伏閣之舉他尚何論在廷臣僚必無奉行之人伏乞速賜處分獻納李宜顯曰當初聖教以遵依祖宗事為諭伏想聖意以為此舉既有前例行之不難而此實有不然者太祖定宗事係是國初草創之際非今日所可援世宗受禪時以羣下力陳之故初亦屢戮屢止及至中廟又有此教而賢相鄭光弼率百僚苦口廷爭終至回天况今時勢比之中廟不啻遼遠則何可近捨中廟中

止之例而遠遵國初之事耶且國家命令當觀人心之如何而自有此事不特在廷百僚遑遑罔措凡在域內舍生之屬舉皆填城溢郭奔走涕泣殿下雖欲抑而行之終不可得矣臣在諫職雖死不敢承順更加三思亟寢前後聖教校理李觀命曰昨緣夜深不得已退出有愧於古人牽裾折檻之義多矣殿下雖欲斷然行之其實不可行之事而上下相持至此甚無益也保護聖躬之道惟當減去文書以便調養之道而此舉實非羣下

之所望也 王世子春秋漸長學問日進一國臣民率皆延頸自上益盡教誨之方啓佑後人以承前烈道理當然矣自古帝王無以憂勤成疾者而如衛士傳餐衡石量書實非憂勤之道也我國煩文末節甚多惟當講究商量以便調養之道矣豈可遽行莫大莫重之事乎校理李晚堅曰今日此舉反害調養之方上下相持章奏之煩瀆十倍平日而殿下之煩惱亦復如何若不允從則臣等雖被誅戮不敢奉承矣内外人心波蕩如此何

以為國乎君臣猶父子也記曰與其得罪於鄉黨州閭寧熟諫父母怒不悅而撻之流血起敬起孝悅則復諫雖被誅戮為 殿下臣子者豈可奉承乎副校理南就明曰天下之事有名有實名實相符然後可以有為 殿下既有大小事稟行之教雖是遺大投艱之後徒有就閑之名反無調養之實矣即今數萬軍民呼泣闕下臣等不得請則無以抗顏以見軍民矣正言鄭必東曰 殿下春秋未至晚暮既非謝事就閑之時春宮學業日就



長進而亦非擔當萬機之時伏乞商度二者之間以從百僚之請正言韓重熙曰自上雖曰有 祖宗朝故事而古今異宜人情駭惑波蕩靡定臣等雖誠意淺薄伏閤其可止乎不但此也 王世子將有伏閤之舉雖緣臣等之進言姑為停止而後日則必有此舉當寒處冷必致損傷其憂如何 殿下欲為調養而反添火症矣吏曹判書洪受瀆曰殿下雖以火症為教治病之方自有道理天命去就在於人心之向背自下此教人心波

蕩此豈教誨而然哉從古以來未有逆理而成事者矣副司直姜覲曰舉國舍生盈庭百僚莫不遑遑人心之悶鬱無以慰安而世子煎迫之情當復如何若不早賜允俞臣等萬無奉承之理矣禮曹判書閔鎮厚曰 聖明雖以 祖宗朝故事為諭而非徒時勢不同殿下之位乃 祖宗之位豈可以其身勤勞一時病患卒然托付於春宮乎 祖宗在天之靈必不悅豫於冥冥之中矣 殿下何不深思乎居閑調養將來之事而目前之切迫

甚多聖侯未寧之中日日煩聒夜夜引接豈  
非添病之道乎世子千萬慮外猝當此舉  
連日陳章將至伏閭之境豈無致傷之慮乎  
留院公事雖有入之之命而當此憂遑之時  
誰敢捧入而裁處乎八路凶歉汲汲遑遑調  
賑之策一日為急 聖明何不軫念乎工曹  
判書宋昌曰以閭家事言之年少子弟猝使  
主管家事而廢業則雖有過人之才智工夫  
漸退終難成就矣世子之猝當此任亦類于  
是 殿下何不念及于此乎 上曰予意已

悉於前後批旨矣予之此舉非出於厭苦萬  
機而然所患漸至沈痼心甚切迫竊欲釋位  
就閑優游晚年矣蓋傳禪之舉事極重大既  
始之後固宜斷然行之而昨今前席大臣諸  
臣之請發於至誠予以否德忝居大位歷年  
雖多寧有德澤之及民者上自股肱輔弼下  
至耆老軍民皆不忍捨予君臣之間分義雖  
曰截然豈無感動之心乎大臣合辭曰聖教  
如此宗社臣民之福也諸臣皆一時感泣  
上亦曰自然感動予又不覺泣然也八路大

無賑事方急若因此舉曠延時日不能及時講究則是益予之過矣以此勉從羣下之請錫鼎曰伏承聖批太平萬年將自今始矣此乃宗社默佑天心自然格回之致臣等不肖何能感回天聽乎堦曰闕下待批者甚多速傳此教宜矣上曰諸疏之批皆以纒於前席勉從羣下之請為辭即令傳諭可也錫鼎曰古語曰君有君人之言三乃者天心改悟上念祖宗付托之意下迫臣民愛戴之情還寢已下之旨此無前之大慶也禹湯罪已

其興也勃然今此下教中謙光之意溢於言表此則禹湯之心也且以賑事為急憂民不懈如此蓋以方寸合於天心而萬民莫不感動矣此教一下衆心歡洽今日之舉實是無前之大慶也願命曰明日當陳賀矣大臣諸臣皆以次退出○荅王世子三疏曰爾之情事不可不念而大小臣僚之積誠陳請終不可孤也故纒已勉從矣

國朝寶鑑卷之五十三

